

M529: Gottfried Hagen: Reimchronik der Stadt Köln (D)

- 0,3978 “-[...]”
 0,3979 mir is komen solich ein bote
 0,3980 iuch beide bevelhe ich zuo gote .”
 0,3981 “hêrre græve mich wundert waz des walte .
 0,3982 daz ir dus heimwert îlt sô balde .
 0,3983 is iuch iet hier danne guot geschiet
 0,3984 ich en lâzen iz iuch ungebezzert niet .
 0,3985 sât anders waz der mæren sî
 0,3986 debaz hûeten wir uns dâ bî”
 0,3987 “sal ich iz danne sagen iuch zwein hêren .”
 0,3988 “jâ” “willt ir belîben in iuweren êren .
 0,3989 sô solet ir iuch von Kölne kêren .
 0,3990 ich sân iuch wes ich mich erværen .
 0,3991 ich sach hînaht wole einliv scharen .
 0,3992 dâr under al einliv tûsent wâren .
 0,3993 und sint iezunt zuo Kölne enbinnen .
 0,3994 wes mohten wir wider got beginnen .
 0,3995 si giengen hînaht algemeine .
 0,3996 umbe Kölne grôz und kleine .
 0,3997 unde sæneten die stat allesamen .
 0,3998 sent Ursula gienc vore mit namen .
 0,3999 unde truoc eine kerze in irere hant .
 0,4000 die überlûhte al dit lant
 0,4001 âne hetten tûsent hundert ander gebrant
 0,4002 dit is in alleme lande bekant .
 0,4003 man en hette sô wole niet dâ ab gesien .
 0,4004 des tar ich wole mit wârheite jien .”
 0,4005 hoert wie der bischov von Meinze sprach .
 0,4006 vrâget es hêrren Stephan . dê iz wole sach
 0,4007 “sât is iz iuch ernest ob is iz iuch spot .”
 0,4008 “hêre iz is wâr als helfe mir got .”
 0,4009 “ich gelouben es wole iuch beiden .
 0,4010 hêre von Kölne lâzet uns gescheiden .
 0,4011 lâzet uns samen vone hinne kêren
 0,4012 ob ir belîben willt in êren .”
 0,4013 dus gap dâ mannelîch sînen sæn .
 0,4014 unde giengen heim zuo lande jân .
 0,4015 noch von Meinze noch von Klive

0,4016 sô was nieman dê dê belibe .
0,4017 ire lotschen entsticketen si mit brande .
0,4018 dê man si vlühtic bî bekante .
0,4019 dus treckete der bischov hine zuo Bunne .
0,4020 wie wænet ir wie hê karmen begunde .
0,4021 hê sprach . “ich hân in allen stücken .
0,4022 beide schande unde ungelücke .
0,4023 ich ne mac ûf Kölne des niet beginnen .
0,4024 dê mit ich êre müge gewinnen .
0,4025 die von Kölne mügen wole sagen .
0,4026 ich sî gevlohen sunder jagen .
0,4027 si sint vrô und ich bin unblîde .
0,4028 is iz in sturme ob in strîte
0,4029 si mügen wole danken unseme hêren
0,4030 si belîben es iemer in den êren .
0,4031 ouch wie ieman habe dit bezziste .
0,4032 si sigent iemer an daz lezzeste .
0,4033 iz is zouber daz dit tuot
0,4034 ob ire gelücke is alze guot .
0,4035 iz is ouch irere heiligen schult .
0,4036 sô mügen si in wole wesen holt
0,4037 sô mir dê got dê mich gebôt
0,4038 ich wære lieber mit êren tôt .
0,4039 vüre Kölne in eineme strîte beliben .
0,4040 danne unverwunten aldus vertriben
0,4041 wê sach laster ie mêre geschien .
0,4042 danne vürsten unbestritten solten vliehen .”
0,4043 bruoder Wulfhart antwerte sîneme hêren
0,4044 “ir solet von disem unmuote kêren
0,4045 unde lâzen iuweren zorn .
0,4046 drî werbe sal man heiles koren .
0,4047 sô mir got lâzet iuweren unmuot .
0,4048 iuwer dinc daz wirdet noch allez guot .
0,4049 nieman en lâze ez ime alze leit
0,4050 ob ime sîn dinc niet eben geit .
0,4051 hêre iz vellt dicke ein tac .
0,4052 daz allez daz jâr niet tuon en mac .”
0,4053 mit deme sprach vort der kirchhêre .
0,4054 von sente Columben “liebe hêre .
0,4055 wizzet daz bruoderes Wulfhartes munt
0,4056 iuch die wârheit hât gekunt .
0,4057 wir zwêne wizen zwei geslehte .
0,4058 die sich underhazent rehte .
0,4059 als katzen unde hunde
0,4060 daz is iuch eine sælige stunde .
0,4061 daz eine sint die von Mülengazzen .
0,4062 die jene die si wider hazzen
0,4063 daz is hêre Herman der græve unde sîne vriunt

0,4064 unde hêrre Walther der vôt daz sî iuch kunt
0,4065 dise tâten den wîsen ire hûs zebrechen
0,4066 en lâzet iuch der reden niet vermechen
0,4067 ir solet vrô sîn unde lachen .
0,4068 wir solen iz mit in alsô machen .
0,4069 und iemer sô begaten daz .
0,4070 daz si halten den sigel von der stat .
0,4071 ich wæne ire ein burgermeister is
0,4072 hê hât den sigel des sît gewis
0,4073 hêre wir solen heimelîche unde mit staten
0,4074 dit dinc nâh iuweren willen begaten
0,4075 hêre an wen solen wir dit alze êrste tragen”
0,4076 “ir solet iz den wîsen allreêreste sagen
0,4077 si riuwet noch ire alte leide .
0,4078 sât in ich sule in sîn gereit .
0,4079 beide nû inde zuo allen zîten .
0,4080 en lâze ich si jenen kumber lîden .”
0,4081 “hêre dit tuot und belîbet gesunt
0,4082 wir solen iz in allez wole tuon kunt .”
0,4083 hier mit riten si in die stat .
0,4084 und entbuten den wîsen daz .
0,4085 daz sî heimelîche zuo in quæmen .
0,4086 und ires hêren boteschaf vernæmen .
0,4087 die wîsen heimelîchen quâmen
0,4088 dâ si die zwêne pfaffen vernâmen .
0,4089 unde vernâmen von in stille
0,4090 zuo mâl des bischoves wille .
0,4091 der boteschaf wurden si alle blîde .
0,4092 in der næmelîcher zîte .
0,4093 ire vriunde si alle gater besanden .
0,4094 die si heimelîcheste bekanten .
0,4095 daz si allesamen quæmen .
0,4096 unde vile guote mære vernæmen .
0,4097 heimelîche ûf einen tac .
0,4098 den man in allen